



Ilinniarnertuunngorniartut aamma ilinniartut ingerlaqqiffiusut pillugit inatsisit allannguuteqarnissani siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, tamatumani qulakkeerneqaqqullugu inuussuttut ilinniartut aamma ilinniartut ingerlaqqiffiusuni soraarummeerni, ilinniartut kalaallisut oqaatsiminnik atuisinnaanissaat pisinnaatitaaffittut inissineqassasoq.

(Inatsisartunut ilaasortaq Najaaraq Møller, Siumut)

(Siullermeerneqarnera)

Qujanaq Inatsisartunut ilaasortaq Najaaraq Møller siunnersuummut.

Amerlasuusugut uagutsinnut tatigiunnaartarpugut, oqaatsitta aappaat imaluunniit oqaatsitta pingajui atorlugit oqaaseqarniartilluta. Tamanna pisarpoq pingaartumik pinngitsaalineqartutut inissikkaangatta soorlu assersuutigalugu misilitsinnerni. Naapertuilluanngitsuvoq, oqaatsinut pikkorissuunnginnerup kingunerissappagu, angusassaraluamiit appasinnerusumik karakterneq.

Tamanna tunngavigalugu qulakkeertariaqarparput, atuartutut/ilinniartutut kalaallit nunaanni ilinniartutut eksaminersinnaaneq namminneq inunnguutsiminnik oqaatsit atorlugit. Ilisimavarput, tassunga atasumik unamminartoqartoq, aqqittariaqakkatsinnik.

Ajunnginnerpaarmi imaakkualarpoq, ilinniartitsisoq censor-ilu kalaallisut paasisinnaallutillu oqalussinnaappata, ajoraluartumilli pivisoq taamaangilaq. Suliniartariaqarpugut, taamaalinissaanut, tamannali angutserlugu aqqiissutissaniq allaniq nassaarniartariaqarpugut.

Ingerlatiinnarlugu nutserineq atorneqarsinnaakuttoorpoq, tassanili ajoqutaasunut ilaassalluni, pingaarutillit nutserinermi ilinniartitsisumut censorimullu annaaneqarsinnaanerit, karakteriliinermi ajortumik kinguneqarsinnaasoq.

Ajortuunngisaannarpoq oqaatsinut pikkorissuuneq. Pingaartumik tuluttut oqaatsit pingaaruteqariartuinnavipput, nunarsuarmioqataanerup annertusiartornerani kingunerisnaallugulu, nunarsuarmi tamarmi tamatta qaninnerulernitsinnik. Imaammammi, suliffeqarfinni amerlanerpaani, avammut niuerneramik suliaqartuni, suliffeqarfissuarni oqaaserineqarmata tuluit oqaasii.

Taamaattumik pingaartuuvooq, uagut angajoqqaatut allallu isumassuisussat meeqqat inuussuttullu kajumissaanissaat oqaatsinik atuartitsinermi ilungersornissaannik. Tassami taamaaliernerisa periarfissarpassuaqalersissammatigit ilinnialernissamut aammalu taassuma malitsigisaanik kissaatigilluinnakkaminnik suliffeqalernissaannut.



Oqareernittuli; aaqqissuussaanerput ima ilusilersortariaqarparput, kalaallisut misilitsissinnaanngorluta, tamanna toqqissisimanermik isumannaatsumillu pilersitsissammat ilinniartumut.

Siunnersuut taamatut oqaaseqaaserlugu ataatsimiititaliami susasaqartumi suliareqqitassanngorlugu innersuussutigaarput.